

SPRM juga buru 'jerung'

Masyarakat diminta kikis persepsi agensi hanya tangkap 'ikan bilis'

Putrajaya: Suruhanjaya Pencegahan Rasuah Malaysia (SPRM) bukan hanya menasaskan penjenayah kecil atau lebih dikenali 'ikan bilis' sebaliknya turut menasaskan 'jerung' yang merujuk kepada penjenayah dalam kes berprofil tinggi.

Ketua Pesuruhjayanya, Tan Sri Azam Baki, berkata persepsi masyarakat yang sering melabel SPRM hanya menahan atau mendakwa 'ikan bilis' dan melepaskan 'jerung' perlu dikikis.

Justeru, beliau berkata, pihaknya akan mencari kaedah terbaik supaya masyarakat tidak terlepas mengikuti perkembangan terkini sesuatu siasatan dan kes dikendalikan SPRM yang dibawa ke mahkamah.

"Berapa banyak 'ikan bilis' SPRM (kenakan tindakan) sekarang berbanding kes berprofil tinggi, sebab ini adalah persepsi mereka.

"Kadang-kadang mereka tertinggal dalam mengikuti laporan (kes SPRM) yang dilaporkan media.

"Setiap kes berprofil tinggi yang kami siasat, saya rasa SPRM melaporkannya termasuk pertuduhan. Ini tidak, mereka masih mengatakan (kami hanya siasat) 'ikan bilis'.

"Saya pun tidak tahu adakah

tangkapan kes berkaitan (penyelewengan dana) MITRA (Unit Transformasi Masyarakat India Malaysia), 1MDB (1Malaysia Development Berhad), SRC International, isu skandal kartel itu dikategori sebagai 'ikan bilis'?" katanya.

Azam berkata, SPRM sentiasa melakukan sebaik mungkin untuk mengambil tindakan terhadap kes rasuah yang membabitkan ketirisan dalam negara, sama ada dilakukan 'ikan bilis' atau 'jerung' yang mendatangkan mudarat kepada rakyat

dan negara.

Perjelas kes tak didakwa

Mengenai status individu ditahan untuk siasatan namun dibebaskan, Azam berkata, perkara itu berlaku disebabkan ada kes tertentu yang tidak dipersetujui Jabatan Peguam Negara.

"Tidak semua kes akan berakhir dengan pertuduhan dikenakan, kita kena terima fakta itu dan hormati keputusan Peguam Negara," katanya menegaskan bahawa Jabatan Peguam Negara tidak pernah menghalang SPRM menjalankan atau meneruskan siasatan sesuatu kes.

Berhubung salah laku dalam kalangan anggota dan pegawai SPRM, Azam berkata, suruhanjaya itu mempunyai jawatankuasa aduan dan tindakan tegas akan diambil terhadap mereka yang terbabit rasuah atau salah laku.

"Kami ada jawatankuasa aduan, saya telah buktikan sebelum ini yang kami sendiri mendakwa mereka (anggota dan pegawai SPRM ada masalah tata tertib) di mahkamah jika ada salah laku," katanya.

BERNAMA

SPRM sentiasa melakukan sebaik mungkin untuk mengambil tindakan terhadap kes rasuah yang membabitkan ketirisan dalam negara, sama ada dilakukan 'ikan bilis' atau 'jerung' yang mendatangkan mudarat kepada rakyat dan negara

Azam Baki,
Ketua Pesuruhjaya SPRM

